



Općinska izborna komisija

Broj: 02OV-01-1-9480/24- 2

Sarajevo, 29.10.2024. godine

Na osnovu člana 22. Poslovnika o radu Općinske izborne komisije Novo Sarajevo, broj: 02OV-01-1-6762/23-1 od 25. augusta 2023. godine, na 47. redovnoj sjednici, održanoj 29.10.2024. godine, *u s v a j a*

**IZVJEŠTAJ O PROVEDENIM LOKALNIM IZBORIMA 2024. GODINE
U OSNOVNOJ IZBORNOJ JEDINICI NOVO SARAJEVO**

Odredbama člana 213. Izbornog zakona Bosne i Hercegovine ("Službeni glasnik Bosne i Hercegovine", broj 23/01, 7/02, 9/02, 20/02, 25/02, 4/04, 20/04, 25/05-ispravka, 52/05, 65/05, 77/05, 11/06, 24/06, 32/07, 33/08, 37/08, 32/10, 18/13, 7/14, 31/16, 41/20, 38/22, 51/22, 67/22, 24/24 i 24/24-ispravka) određene su sljedeće nadležnosti Općinske izborne komisije:

- nadgleda i kontrolira rad Centra za birački spisak iz člana 3.8 ovog zakona,
- određuje biračka mjesta na području Općine za glasanje na svim nivoima vlasti u Bosni i Hercegovini,
- provodi postupak imenovanja, imenuje i obučava članove biračkih odbor,
- brine o sigurnosti i dostavljanju biračkim odborima izbornog materijala za glasanje na svim nivoima izbora u Bosni i Hercegovini,
- obavještava birače o svim informacijama potrebnim za provedbu izbora u skladu sa propisima Centralne izborne komisije Bosne i Hercegovine,
- odgovorna je za uređenje biračkog mjesta i druge tehničke pripreme za izbore,
- odgovorna je za pravilno brojanje glasačkih listića na biračkim mjestima i u općinskim centrima za brojanje,
- objedinjuje rezultate izbora sa svih biračkih mjesta u općini, posebno za svako tijelo za koje su provedeni izbori i dostavlja ih Centralnoj izbornoj komisiji Bosne i Hercegovine,
- obavlja druge poslove u skladu sa zakonom i propisima Centralne izborne komisije Bosne i Hercegovine.

Centralna izborna komisija BiH je Odlukom o raspisivanju i održavanju Lokalnih izbora 2024. („Službeni glasnik BiH“, broj: 31/24) koja je donesena 08.05.2024. godine, raspisala neposredne izbore, između ostalog, za općinska vijeća i načelnike općina u Federaciji BiH, za 06.10.2024. godine. Donošenjem Odluke, počeli su teći rokovi za realizaciji aktivnosti u nadležnosti Općinske izborne komisije Novo Sarajevo (Izborna komisija).

(1) Redovnost u održavanju sjednica i transparentnost u radu Izborne komisije

Izborna komisija je od dana raspisivanja Lokalnih izbora 2024. godine do 29.10.2024. godine, kada je usvojen ovaj Izvještaj, održala 20 sjednica, različitog formata (redovnih, vanrednih i korespondentnih). Sjednice su održavane kako u skladu sa ranije utvrđenom dinamikom rada, tako i onda kada je to zahtijevao izborni proces, radnim danima i vikendom.

Najave sjednica kao i informacije o donesenim zaključcima na sjednicama su redovno i blagovremeno objavljivane na web stranici Općine Novo Sarajevo, i to u okviru sekcije kojoj se pristupalo klikom na logotip Lokalnih izbora 2024. godine, koji je dostupan na naslovnoj stranici Općine Novo Sarajevo ili putem sekcije Općinska izborna komisija koja se nudi u okviru naslova Općinsko vijeće, na naslovnoj stranici web stranice Općine Novo Sarajevo. Nažalost, web stranica u dijelu logotipa Lokalnih izbora 2024. godine kao i Općinske izborne komisije, i dalje je nepregledna i teško uočljiva za posjetioce web stranice Općine Novo Sarajevo, uprkos opetovanom obraćanju Izborne komisije Službi za poslove Kabineta Općinskog načelnika (u februaru i aprilu 2024. godine). Ignorisanje zahtjeva Izborne komisije u vezi sa web prezentacijom njenih aktivnosti, oglasa i javnih poziva, dovodi u pitanje adekvatnu informisanost političkih subjekata i građana Općine Novo Sarajevo o aktivnostima Izborne komisije, a potencijalno i ostvarivanju njihovih prava i obaveza.

(2) Osiguranje finansijskih i materijalno-tehničkih sredstava i prostora za održavanje izbora

Izborna komisija je izradila Prijedlog finansijskog plana za provođenje Lokalnih izbora 2024. godine, u iznosu od 288.906,93 BAM, dok je Općinsko vijeće Novo Sarajevo usvojilo budžet u iznosu od 240.000,00 BAM. Nakon što je Centralna izborna komisija BiH donijela Odluku o naknadi za rad u biračkim odborima na provođenju Lokalnih izbora 2024. godine (prečišćeni tekst), broj: 07-2-50-4-624-4/24 od 06.06.2024. godine, Izborna komisija je podnijela zahtjev za povećanje budžeta, te su Izmjenama i dopunama budžeta Općine Novo Sarajevo za 2024. godinu obezbijedena sredstva i samim tim su se stekli uslovi za provođenje izbora.

(3) Biračka mjesta

Na području izborne jedinice Novo Sarajevo je bilo 101 redovno biračko mjesto, te jedno biračko mjesto za glasanje u odsustvu, kojem je bilo pridruženo biračko mjesto za glasanje nepotvrđenim glasačkim

listićima (501 i NNN). Birčka mjesta su bila smještena u javnim ustanovama, mjesnim zajednicama i privatnim poslovnim prostorima (Kulturno-umjetničko društvo „Lola“ i Udruženje Klub borilačkih sportova „Perfect“).

(4) Birački odbori

Odmah po raspisivanju Lokalnih izbora 2024. godine, Izborna komisija je raspisala javni oglas za izbor kandidata za popunu rezervne liste kvalifikovanih osoba za imenovanje članova biračkih odbora/mobilnog tima i njihovih zamjenika, a koji je potom ponovljen dva puta. Dana 07.08.2024. godine održano je žrijebanje sedam političkih subjekata za mjesto u biračkom odboru, koji su potom bili u obavezi da dostave prijedloge kandidata za pozicije člana i zamjenika člana biračkih odbora.

Od 19.09. do 01.10.2024. godine održana je obuka za kandidata za članove biračkih odbora i njihove zamjenike, a nakon što su uspješno položili test znanja, Izborna komisija je donijela rješenje o imenovanju članova i zamjenika članova biračkih odbora/mobilnog tima. Usljed kontinuiranog odustanka imenovanih članova i zamjenika članova biračkih odbora (a posebno onih imenovanih na prijedlog političkih subjekata), koje je trajalo kontinuirano sve do otvaranja biračkih mjesta, na dan izbora, u 07:00 sati, Izborna komisija je svakodnevno morala pristupati izmjenama i dopunama rješenja o imenovanju članova i zamjenika članova biračkih odbora, kako bi osigurala popunjenost biračkih odbora (jer bez potpunih biračkih odbora nije bilo moguće otvoriti biračko mjesto) kao i spriječila da u članstvu jednog biračkog odbora se nalazi više od jednog predstavnika jednog političkog subjekta. Napominjemo da je predsjednike i zamjenike predsjednika biračkih odbora imenovala Centralna izborna komisije BiH.

(5) Akreditovanje posmatrača političkih subjekata

Razmatrajući zahtjeve za akreditaciju političkih subjekata i izbornih posmatrača, Izborna komisija je akreditovala šest političkih subjekata i ukupno 167 izbornih posmatrača.

(6) Aktivnosti Centra za birački spisak

U periodu od 05. juna do 06. jula 2024. godine u prostorijama mjesnih zajednica i Centra za birački spisak (u zgradi Općine Novo Sarajevo) bilo je izložen/dostupan Privremeni birački spisak za Općinu Novo Sarajevo.

(7) Prijem i distribucija izbornog materijala

Dana 13. septembra 2024. godine, od strane Centralne izborne komisije Bosne i Hercegovine, zaprimljen je „neosjetljivi“ materijal. Dana 3. oktobra 2024. godine dostavljeni su glasački listići – „osjetljivi“ materijal. Po prijemu svakog od ovih materijala izvršen je uvid u specifikaciju i izvršena kontrola prispjelog materijala. Isti je bio uskladišten i pod stalnim policijskim nadzorom od dana prijema do dana održavanja

izbora, odnosno, do otpreme na biračka mjesta. Glasački materijal, neosjetljivi i osjetljivi, dostavljen je na biračka mjesta, prema važećim propisima, 12 sati prije otvaranja biračkog mjesta, dakle u subotu 05.10.2024. godine uz obezbjeđenu policijsku pratnju, na predviđena biračka mjesta na kojima je već bio izvršen KDZ pregled. Policijska uprava Novo Sarajevo obezbjeđivala je lokacije biračkih mjesta od dostave izbornog materijala pa do završetka izbornog procesa i povrata izbornog materijala.

(8) Izborni dan

Sva biračka mjesta otvorena su 06.10.2024. godine u 07:00 sati, a zatvorena u 19:00 sati. Od ukupno 67.602 birača, na izbore je izašlo 27.572 glasača, što u procentu iznosi 41,00 %. Putem mobilnog tima su glasale 24 osobe.

Prema informacijama objavljenim dana 24.10.2024. godine, na web stranici Centralne izborne komisije BiH, za nivo Načelnika Općine, od ukupno obrađenih listića 27.868, važećih je bilo 26.354. Nevažećih praznih listića je bilo 774, a nevažećih po drugim kriterijima 740. Za nivo Općinskog vijeća Općine Novo Sarajevo, od ukupno obrađenih listića 27,876, važećih je bilo 26.292. Nevažećih praznih listića je bilo 219, a nevažećih po drugim kriterijima 1.365.

(9) Objedinjavanje izbornih rezultata

Izborna komisija Novo Sarajevo je u najkraćem roku prikupila pojedinačne rezultate sa biračkih mjesta, iste objedinila i unijela u JIIS.

Postupajući po Naredbi Centralne izborne komisije Novo Sarajevo (broj: 05-1-07-2-3168-1/24 od 08.10.2024. godine), Izborna komisija je, u cilju pravilnog objedinjavanja utvrđenih izbornih rezultata, dana 09.10.2024. godine, izvršila otvaranje vreća s glasačkim materijalom i ponovno brojanje glasačkih listića za sedam biračka mjesta.

(10) Prigovori i žalbe u izbornom procesu

Izborna komisija je zaprimila 13 prigovora, od čega su: tri odbačena (jedan je bio nedopušten, a za dva se smatra kao da nisu ni podneseni, jer nisu blagovremeno dopunjeni i precizirani); jedan je usvojen kao osnovan; devet prigovora je odbijeno kao neosnovano. Politički subjekti nisu uputili niti jednu žalbu protiv odluke Izborne komisije.

Izborna komisija je također zaprimila jedan podnesak Koalicije „Pod lupom“, na koji je odgovorila blagovremeno.

Izborna komisija zaključuje da su Lokalni izbori na području izborne jedinice Novo Sarajevo provedeni u skladu sa Izbornim zakonom BiH i podzakonskim aktima Centralne izborne komisije. Također, budući da je izlaznost građana Općine Novo Sarajevo na Lokalnim izborima 2024. godine bila 41% nužno je uložiti dodatne napore o informisanju i edukaciji građana Općine Novo Sarajevo o važnosti učešća u izbornom procesu. Pored toga, posebni naponi će morati biti uloženi u afirmaciji građana da se prijave za popunu rezervne liste kvalifikovanih osoba za imenovanje članova biračkih odbora/mobilnog tima i njihovih zamjenika. Naime, imajući u vidu kontinuiranu nemogućnost političkih subjekata da kandiduju dodijeljeni im broj mjesta članova i zamjenika članova biračkih odbora, kao i odustajanje kandidovanih odnosno imenovanih članova i zamjenika članova biračkih odbora, bez adekvatnog interesa građana za ove pozicije, u budućnosti neće biti moguće provesti izbore, izuzev ukoliko ne dođe do promjene odredi Izbornog zakona BiH.



